



AKTIVITI... sebahagian aktiviti yang diadakan pada program itu.

## UMS dan IKATAN anjur kursus kenegaraan

*NST 16-01-2012 8*

**KOTA KINABALU:** Dalam usaha menyempurnakan tugas subjek Dinamika di bawah naungan Prof Madya Dr. Baharom Bin Mohamad, pelajar-pelajar Pascasiswazah (Pengurusan Pendidikan) amalan 2011/2012, Sekolah Pendidikan Pembangunan Sosial Universiti Malaysia Sabah (UMS) dengan kerjasama Pertubuhan Pembina Generasi Sabah (IKATAN) telah mengadakan Kursus Kenegaraan - Program Transformasi Baktiswazah yang telah diadakan di Kem Bina Negara Kundasang baru-baru ini.

Program ini telah melibatkan pelajar pasca siswazah ini sendiri, pelajar Institut Pendidikan Guru (IPG) Tawau serta turut melibatkan

peserta daripada Sarawak dan Semenanjung Malaysia.

Objektif utama Kursus Kenegaraan - Program Transformasi Baktiswazah ini diadakan adalah untuk membuat satu perkongsian di kalangan belia dan beliawanis serta penjawat awam supaya menerapkan nilai-nilai murni di dalam diri setiap individu secara keseluruhan.

Program ini berjaya mencapai matlamatnya apabila tentatif program yang dirancang telah berjalan dengan lancar. Antara aktiviti yang dijalankan ketika program ini diadakan adalah seperti latihan dalam kumpulan, perbincangan mengenai kenegaraan, kawad kaki, kembara malam, serta ceramah dari pihak Biro Tatanegara Negeri (BTN) sendiri.

Antara pengisian program ialah pihak penganjuran (Pelajar Pascasiswazah UMS) mampu membawa Pengarah Biro Tatanegara Negeri Sabah iaitu Datuk Ibrahim Bin Saad bagi mengisi slot Ceramah 1 dan juga sesi Tazkirah maghrib pada 29 Disember 2011.

Pengisian yang dijalankan oleh IKATAN sesungguhnya sangat diperlukan untuk memangkin generasi berfikir kelas pertama pada alaf ini.

IKATAN merupakan pertubuhan bukan kerajaan (NGO) yang ditubuhkan pada 12 Ogos tahun lalu, merupakan satu pertubuhan NGO

yang baru tetapi pengalaman mereka dalam mengendalikan program dan aktiviti sedemikian tidak boleh dinafikan.

Sesungguhnya, kerjasama padu antara BTN, IKATAN dan Pelajar Pascasiswazah (Pengurusan Pendidikan) UMS boleh dijadikan satu titik tolak ke arah pelestarian pendidikan menerusi program-program seumpama ini.

Program seperti ini wajar dilaksanakan dalam usaha kerajaan untuk memupuk nilai-nilai murni di kalangan rakyat Malaysia pada hari ini. Penyemaian budaya permuafakatan dan silaturrahim di kalangan peserta jelas menunjukkan program 3 hari 2 malam ini sedikit sebanyak telah memberikan impak yang positif dalam diri mereka.

Perasmian Penutupan telah disempurnakan oleh Pengerusi IKATAN, Norhasdi Hassan, pada hari terakhir program ini berlangsung. Usaha pelajar-pelajar Pascasiswazah (Pengurusan Pendidikan) 2011/2012 dengan kerjasama IKATAN mengadakan program seperti ini seharusnya terus dilaksanakan agar negara dapat melahirkan generasi yang beretika, berilmu serta mapan sekaligus membenarkan negara untuk bersaing dengan negara-negara gergasi dunia yang lain. Sesungguhnya, 'Mahasiswa Menyahut Seruan Kerajaan Ke Arah Transformasi'.



ALBUM KENANGAN.... Prof Madya Dr. Baharom (Tiga dari kiri) dan empat dari kiri Ibrahim kiri) bersama peserta-peserta BTN.